



*K*hutba *Eid-ul-Adha*

Hazrat Khalifatullah Munir. A. Azim (atba)

01 Août 2020
10 Dhul-Hijjah 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam et **EID-UL-ADHA MUBARAK**, Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine dire:



Eid-ul-Adha, li pas ene fête couma les autres. Li pas ene fête ki marque la joie et réjouissance couma *Eid-ul-Fitr*. Li marque au contraire l'esprit de sacrifice de Hazrat Ibrahim (as), le grand prophète, ancêtre de nous bien-aimé Prophète Hazrat Muhammad (saws).

Sa grand sacrifice là fine perpétuer pour servi de leçon à l'humanité. Tous dimounes conne l'histoire là. Moi-même plusieurs Khutbas mo fine faire lors l'histoire de Hazrat Ibrahim (as) et so garçon Hazrat Ismaël (as). Lire mo

bane Khutbas ki mo fine faire dans bane l'années précédents à l'occasion de Eid-ul-Adha ; li pas nécessaire mo révine lors là encore.

C'est ki tous dimounes pas conner et ki bizin conner, c'est leçon ki capave tirer et ki bizin tirer de sa sacrifice là. Sans sa sacrifice là, Hazrat Ibrahim (as) pas ti pour capave faire li valoir comme le Camarade d'Allah (*Khalilullah*). Pense ene coup ou même, après ki ou fine vine papa à ene l'âge avancé kot pas ti ena zenfant, ou fine fer beaucoup *duahs* avec Allah (swt) pour donne ou ene zenfant, ene héritier de ou propre semence, avec tant de *duahs* avec Allah (swt), et kan Allah (swt) fine donne ou ene zenfant, kot Li accepter ou *duahs*, Li guetter maintenant ki quantité l'amour ou ena, si pas ou l'amour pour sa zenfant là ki Li fine donne ou là plisse ki l'amour ki ou ti bizin ena pour Li, et Li faire ene teste avec ou.

Combien dimounes ki pas fine ena zenfant, kan zot ti enkor jeunes, fek marier et avec beaucoup zeffort zot fine alle guette bane docteurs spécialistes, gynécologues, pour gagne bane médicaments et dépense ene quantité l'argent pour gagne zenfants. Et aussi ena mo conne ene bane ki faire beaucoup *duahs* avec Allah et demande pour faire *duahs* pour zot et par la grâce d'Allah, Allah accepter zot bane zefforts de côté médicale et zot bane *duahs* aussi kot zot fine place zot confiance dans Allah, et Allah fine donne zot ene zenfant. Et de ce fait, ene zenfant unique pour la famille, ki kalité zot content zot ena ene zenfant, gâte li, grandi li, donne li tous céki li bizin, dépenser dans so l'étude, faire tout pour li avec contentement, et nek ene seul coup ene malheur arriver kot zot perdi sa zenfant unique là. Couma li ene coup bien dur pour sa maman, papa là. Sa faire ou comprend ki nous tous appartenir à Allah, ene coup Li capave reprend nous tous avec Li. Li faire céki Li ouler sans rendre compte à personne.

Donc, ici pense ene coup pour Hazrat Ibrahim (as), à ene tel l'âge avancé Allah donne li ene garçon. Li ti ena ene l'amour extra pour Allah ; so croyance dans ene seul Dieu, so confiance et so dévotion ti extraordinaire kot li fine passe par plusieurs testes. Kan ou lire le Quran Shariff, ou trouve sa bane sacrifices ki Hazrat Ibrahim (as) fine faire là. Li fine faire so peuple et même so papa comprend ki : *Ou pé adore céki ou même fine sculpter* ; et li fine rode faire zot réfléchi bien kot li dire zot : « **Wallahu khalaqakum wa maa ta'-maluun.** » [*C'est Allah ki fine crée ou et aussi tous céki ou fabriquer.*] Li fine rode amène zot dans le droit chemin, croire dans ene seul Dieu ki fine crée zot ; alors guette ki bane là dire : « **Qaalubnuu lahum bunyaamat fa-alquuhu fil-jahiim.** » [*Zot dire: 'Construire ene fournaise pour li et lance li dans la flamme'.*] (As-Swaffat 37 : 98).

Guette bane *Zaalim* zot raisonnement couma été, bane ki zot lécoeurs fine attacher avec zot idole/s. Ou trouver ki à sak fois ki Allah envoie So Messenger, So Prophète, ena sa bane qualités *Zaalim* là. Dans nous l'époque même ena bane *Zaalim* coumsa et bane Mullahs fanatiques, pareil couma ena Mullah dans Tamil Naidu fine dire ki so Khalifa fine ena pitié pour moi, ti bizin donne moi « *death penalty* » [la peine de mort]. Ou trouver ! À sak fois ki ene Messenger vini pour amène dimounes, amène l'humanité vers Allah, zot lécoeur fine attacher avec zot idole, mais l'humiliation divine pour tombe lors sa bane qualité *Zaalim*, Mullahs là.

Donc, ici kot Allah (swt) sappe So camarade (*Khalilullah*), Allah dire: « **Fa-araadun bihii kaydan-fajaal naahumul-asfaliin!** » [*Zot ti ouler complete contre li, mais nous ti mettre l'humiliation lors zot.*] Et l'heure là même Hazrat Ibrahim dire : « **Innii zaahibun ilaa Rabbi sayahdiin** » [*Mo alle vers mo maître. Li va guide moi.*]

Et céki fine arriver, li fine faire tellement camarade avec Allah, par so la foi lors so Créateur kot li [sa la foi là] fine vine bien solide, bien grand et so confiance lors so Créateur péna mot pour décrire ki qualité confiance li ti ena pour Allah, et kot li fine montrer l'humanité, ki malgré so l'âge bien avancer, et à travers so confiance et so la prière pour Allah, bane kitchoses ki impossible ki l'homme pas ti capave même concevoir [penser] et sa vine possible. Et sa fine prouver kot le Quran Shareef mentionne sa, ki Hazrat Ibrahim (as) faire sa *duah* là avec full confiance, ki péna aucaine doute là-dans ki Allah (swt) pour faire sa miracle là et sa pour rester jusqu'à Jour Qiyamah. Sa *duah* là c'est: « **Rabbi habli minas Saalihiin** » [*Ô mo Maître accorde moi ene zenfant ki pour parmi bane bon dimounes.*] Effectivement, so *duah* fine accepter par Allah kot Allah dire: « **Fabash-shar-naahu bi Gulaamin Haliim.** » [*Alors Nous fine annonce li la naissance ene garçon avec ene tempérament douce.*] (As-Swaffat 37: 102).

Allah (swt) même dire ki Hazrat Ibrahim (as) ti ene serviteur ki ti ena la foi beaucoup lors Allah, lors ene seul Bondié et Allah (swt) fine montrer l'humanité ki qualité la foi Hazrat Ibrahim (as) ti ena. Kot nous ti pour alle conne tous sa là, si Allah (swt) pas ti révèle So Nabi Kareem (saws) et établir dans Quran kot Li faire mention couma Hazrat Ibrahim (as) fine trouver dans so rêve ki li pé coupe licou so garçon Hazrat Ismaël (as). Hazrat Ibrahim (as) fine envie réalise sa rêve ki Allah fine montrer li là et li fine attane so garçon arrive à ene l'âge de compréhension, kot tous les deux (c.à.d., papa et garçon) pé voyager et li raconte sa rêve là avec

so garçon, ki li fine rêver ki li pé coupe so licou et li dire so garçon : *Ki to penser ?* Et guette l'esprit sacrifice de so garçon aussi et Hazrat Ibrahim (as) ti envie conne lécoeur et croyance de so garçon à propos de sa rêve ki Allah fine montrer li là et couma Allah ti annonce Hazrat Ibrahim (as) ki li pour ena ene garçon avec ene tempérament douce. Alors, garçon là dire so papa : « **Yaaa'abatif al-maatu maar: satajidunnii inshaaa-allaahu minas-saabirin.** » [*Ô mo papa, faire céki to fine gagne l'ordre. To va trouve moi, si Allah ouler, plein d'endurance.*] (As-Swaffat 37: 103).

Réfléchi ene coup kot ene papa à ene l'âge avancé ; demande ou pour sacrifier l'être ki ou plus content dans ou la vie - ou zenfant unique! Ou obéir sa l'ordre là et avec courage ou trappe ou zarme tranchant, prêt pour égorge ou zenfant! Ki sanlà de nos jours prêt pour faire sa pour ene motif aussi élever : faire plaisir au Créateur Suprême ? Sa Allah Miséricordieux là, eski Li ti assoiffé di sang Ismaël (as) ou bien Li tout simplement guette sincérité So serviteurs?

Allah (swt) fine conne sincérité de So serviteurs kan tous les deux ti fine soumettre à l'ordre Allah et kot Hazrat Ibrahim (as) fine renverse Hazrat Ismaël (as) lors so front pour sacrifier li, là même kot fine ena sa *Takbir Tashreek* là: « **ALLAHU AKBAR, ALLAHU AKBAR, LAA ILLAHA ILLALLAAHOU, ALLAHU AKBAR, ALLAHU AKBAR WAA LILLAHIL HAMD.** » Allah (swt) commande Jibraël (as) pour amène ene compensation et Jibraël (as) trouve sa action de Ibrahim (as) kot pé alle coupe licou so garçon. Li fine comprend ki l'amour Allah ti pli fort ki so l'amour pour so garçon, kot li [Jibraël (as)] commence lire : « **ALLAHU AKBAR ALLAHU AKBAR.** »

Kan Hazrat Ibrahim (as) tende sa la voix là, li trouve sa comme ene bon nouvelle. Li commence crier : « **LAA ILLAHA ILLALLAAHOU, ALLAHOU AKBAR** » et Hazrat Ismaël (as) fine comprend ki c'est ene compensation, li commence lire bane paroles suivants en chantant bane louanges d'Allah et en remerciant Allah: « **ALLAHU AKBAR, WA LILLAHIL HAMD.** »

Allah (swt) pas ti bizin sa sacrifice humain là Li. Sa pas ti So l'intention pou vraiment laisse papa et garçon alle faire sa sacrifice humain kot disang de so garçon alle couler, sinon sa ti pour reste dans l'histoire kot ene prophète et en plus ene papa fine coupe licou so garçon à cause ene rêve ki li fine fer, *Nawzubillah Min Zaalik*. Allah (swt) pas ene Dieu cruel. Li fine envie fer l'humanité

conner ki qualité l'amour Ibrahim (as) ti ena pour Allah, ene l'amour plisse ki li ena pour so propre zenfant, kot Allah fine mentionne dans Quran : « *Ô Ibrahim, to fine ena la foi dans to vision (rêve ki Mo fine montrer toi) et to la foi pour Moi [Allah] bien grand.* » C'est sa ki Allah dire : « **Inna kazaalika najzil-muhsiniin** » [Nous récompense bane ki faire du bien comme sa.] Et Allah dire sa vraiment ene test ki Li fine faire avec Ibrahim et aussi avec Ismaël (as).

Donc, pour commémorer l'esprit de sacrifice Ibrahim (as) lors so garçon, Allah (swt) pas fine laisse sa vague comme sa même. Allah dire : « **Wa fadaynahu bizibhin aziim; wa taraknaa alayhi fil aakhiriiin; Salaamun alaa Ibraahim** » [Et Nous ti mettre dans so place ene gros zanimal pour sacrifier. Nous fine laisse so renom dans la postérité, la paix lors Ibrahim.]

Guette sa sacrifice de Ibrahim (as) là, kot so renom fine reste dans la postérité même kot Allah (swt) fine béni li encore, fine donne li encore ene garçon, Hazrat Issac (as), ene prophète même et dans descendants de sa deux garçons là fine ena prophètes. Sa même ki Allah (swt) dire : « **Kazaalika najzil-Muhsiniin** » [Comme sa Nous récompense bane ki faire du bien].

Et ou fine trouver ki dans descendants Issac (as) fine ena prophètes et kan dans sa descendants là, bane dimounes fine rejette sa bane faveurs et bénédictions divines là, Allah (swt) fine arrache sa avec zot et fine donne sa dans bane descendants de Hazrat Ismaël (as) kot li même ki ti mette so licou pour sacrifier. Allah (swt) fine envoie le plus grand prophète, Hazrat Muhammad (saws) dans so descendance, et Li fine envoie li (saws) avec ene religion ki Allah fine parfaire et fine donne le nom **ISLAM** et ene Livre ki péna aucaine doute là-dans et li ene guide selment pour bane *Muttaqi* (bane ki ouler suivre le droit chemin). Et sa grâce et faveur divine là pour continuer aller jusqu'à le jour du *Qiyamat*.

Donc li *Waajib* (obligatoire) pour lire Takbir Tashreek depuis 9^{ème} jour Dhul-Hijjah après Namaz Fajr jusqu'à 13^{ème} jour Dhul-Hijjah après Namaz Asr (sois pendant 23 Namaz ki ou dans ou la caze, Masjid, en voyage, ki ou hommes, madames ou zenfants ; bizin lire Takbir après sak Namaz, après Namaz Eid (3 fois), lire Takbir à haute voix après Namaz en Jamaat, mais madames lire à voix basse. Si arriver Imam fine oublier lire Takbir après Namaz, li appartenir à bane *Muqtadi* (suivants, la congrégation) pour lire le Takbir.

Donc, Hazrat Ibrahim (as) so titre de *Khalilullah* pas fine gagner avec facilité. Li fine bizin dans so la vie fer face à bane épreuves bien dure, mais ki par la grâce d'Allah li fine capave fer face d'ene façon remarquable. Hazrat Ibrahim (as) fine montrer la patience, la soumission et ene contrôle de soi tout à fait extraordinaire. Ou pour rappelle so conviction dans Allah kan bane l'ennemis ti jette li dans ene grand difé pour tuer li et aussi kot li ti gagne l'ordre depuis Allah pour abandonne so madame [Hazrat Hajra (ra)] et so garçon Hazrat Ismaël (as) dans ene vallée sec et désert (ki pli tard pour vine Makkah).

Bane principales enseignements ki nous tirer de comportement, réaction et geste de Hazrat Ibrahim (as) c'est justement so soumission sans limites à l'ordre Allah. En d'autres mots, Hazrat Ibrahim (as) ti prêt pour tous sacrifices pour soumettre li à la volonté d'Allah. C'est sa z'arme là ki nous bizin forger pour protège nous dans sa l'environnement (spirituelle) kot nous pé vivre là et kot pé vine de plus en plus difficile pour pratique nous *Deen*.

Bizin arriver à sacrifier nous bane l'envies pour ene plus grand soumission à Allah, mais aussi pour ki Allah aide nous, protège nous et faire nous tini ferme lors nous pas. *Insha Allah*.

Ene Qurbani ki ti faire plisse ki 4000 ans de cela dans ene désert tous près de Khana Kaaba, guette couma Allah (swt) fine garde vivant sa sacrifice là. C'est dans sa sens là-même ki Hazrat Muhammad (saws) fine dire ki : *Guetter couma mo bane Sahaba fine vine bane zétoiles et astaire zot népli bane la grains disable ki ou ti pé écraser, zot népli bane ki pé trainer lors disable chaud, zot népli pé exposer dans soleil ou ti pé mette bane roches lors zot. Par la grâce d'Allah, guette ki stage zot fine arriver, ki stage Allah fine amène zot. Zot fine vine bane bel zétoiles pour tous les temps pour guide ou.*

Guette la vie de bane Sahaba de Hazrat Muhammad (saws), Ô mo bane disciples ! Sa pour reconforte ou, kot ou aussi ou pour vine bane zétoiles de sa l'époque là. Sa c'est ene nouveau chapitre dans l'histoire de la vie humaine de sa siècle là : **Arise and Create A New World.**

Par la grâce d'Allah nous bane esclaves de Hazrat Muhammad (saws), et guette avec l'aide d'Allah avec quel éclat nous pour ré-ouvert sa chapitre là dans le monde entier. Laisse sa bane Mullahs ki pé zapper couma li chiens parski caravan

pou continuer faire so chemin. Sa bane Mullahs là, couma Allah fine dire dans Quran, zot couma bane bourriques ki effrayer devant le Lion d'Allah. Partout dans le monde entier kot ena mo bane disciples, nous prêt dans tous circonstances pour réponde à l'appel d'Allah: **Labbaik Allahumma Labbaik**. Nous présent pour sacrifice là aussi. Nous pas peur aucune créature ki so lécoeur fine attacher avec so idole/s ou guette visage de sa bane Mullahs ki zot lécoeur fine dévier complètement lors le *Tawheed* ; péna respect pour le *Tawheed*, ni ena l'amour et respect pour nous bien-aimé prophète (saws). Zot fine piétine l'enseignement d'Allah et So Prophète (saws).

Pas oublier dans sa l'année là même dans ene mois Ramadhan, kan ou guetter certains Mullahs Ahmadis ki kalité bas zot fine vini kot zot ti réjouir lors la mort ene pauvre dimoune, âge de 83 ans et cause bane paroles blessants, insultants et provocants, mais *Alhamdulillah* nous conne valeur mois Ramadhan ; ene mois de patience. Nous prend ene jolie patience pour gagne ene jolie récompense.

Bane Maulvis Ahmadis pé zapper là-bas couma Shaytan, ici Marhoom Kaja Maideen so belle-fille, Jasmine Saheba tende ene voix en urdu ki dire ki Kaja Maideen fine *Shaheed* et d'autres messages encore li fine recevoir, *Alhamdulillah Summa Alhamdulillah*. Kot bane Mullahs Ahmadis fine aller ? Zot fine piétine paroles de Nabi Kareem (saws).

Mo mette ene seul Hadith devant sa bane Mullahs ki fine attacher avec zot idole. Dans Bukhari Shariff: Abu Musa (ra) raconter ki li fine demande le Saint Prophète (saws) : « *Ki sanla ene bon musulman?* » Le Saint Prophète (saws) fine réponde : « *Celui ki évite faire du tort à so frère musulman avec so la langue et so la main.* »

À cause faute de temps, mo ti pour cite à l'attention de sa bane Mullahs ki fine dévier là encore ene Hadith mais zot encore dans maternelle, laisse zot apprane sa par cœur et mette li en pratique et ensemble zot faire beaucoup *Istigfaar* avec Allah (swt) kot zot capave largue la corde idole et attrape la corde d'Allah fort, *Insha-Allah*.

Couma zot trouver, zot pé témoigner, la promesse d'Allah toujours vrai. Ene promesse ki Allah fine faire depuis longtemps, Allah capave faire li réaliser des années plus tard sans ki personne attane. Couma zot conner, ki li Nasir Ahmad Sultani, Tahir Ahmad Naseem et Abdul Ghaffar Janbah, tous les trois fine dire

publiquement ki mo ene menteur, et ki c'est zot ki vrai, et mo fine même faire ene Mubahila officielle avec ene là-dans, Abdul Ghaffar Janbah pour ene période de deux ans, kot nous ti prier pour ki Allah fini Jamaat ki fausse, ki pas dans faveur Allah [nous pas ti prier pour la mort de quique ce soit ; sa pas ti dans nous Mubahila officielle]. Et moi et avec mo disciple Fazil Jamal Sahib nous ti signe sa Mubahila là, et Abdul Ghaffar Janbah ensam avec so disciple Mansoor Ahmed ti signe sa Mubahila là. Zot ti gagne le toupé après sa période de deux ans là pou déclare Abdul Ghaffar Janbah comme le vainqueur de sa Mubahila là, tandis ki pendant sa période de Mubahila là, papa de Mansoor Ahmed Sahib, au vu et au su de tous, ti quitte Janbah officiellement et fine alle zoine camp de Nasir Ahmad Sultani, et par peur, avant la fin de terme de Mubahila, zot fine faire li retourne dans Jamaat de Janbah Sahib.

Mais avec le temps, Allah fine montrer avec ki sanlà vraiment Li été. *Alhamdulillah, Summa Alhamdulillah*. Nous fine trouver couma Allah fine grandi so Jamaat Ul Sahih Al Islam, fine contigner donne nous So support, et fine ouvert nous chemin pou accomplir ene plus grand prophécie dans l'histoire de l'Islam, c'est-à-dire, celui de l'accomplissement de Umrah ou Hajj par le Messie, Isa ibn Maryam, kot Hazrat Muhammad (saws) ti trouve le Messie faire le tour (*Tawaaf*) Ka'aba Shariff. *Alhamdulillah, Summa Alhamdulillah*, sa grand prophécie là fine accomplir le 20 Février 2018 kan moi et mo la famille nous fine alle fer le Umrah sans aucaine grand difficultés. Allah même ti faire sa promesse là et c'est Li-même ki fine ouvert le chemin pou nous alle faire nous Umrah.

Donc, de jour en jour Allah pé montrer et déverse So *Rahmat* (grâces) lors nous, et tous bane ki fine challenge moi ou sois ki fine fer l'intention pou proclame zot officiellement comme le Messie Promis et le Prophète d'Allah de sa siècle là, guette couma zot fine fini. Tandis ki nous pas souhaite le malheur de personne, mais Allah conne mieux lécoeur et l'intention de sakaine de So bane créatures, si pas zot genuine dans zot bane proclamations ou pas. Pareil couma Allah dire dans Quran, celui ki cause menti lors Li ou ki dire ki li gagne révélations, sans ki sa vraiment vine de côté d'Allah, alors Allah pou attrape li.

Dans sa cadre là, nous fine trouver saki fine arrive Asad Shah Sahib de L'Écosse, kot li ti assassiné le 24 Mars 2016, tandis ki Nasir Ahmad Sultani fine arrêter par l'autorité Pakistanaise le 21 Mars 2017 et jusqu'à ce jour nous pas conner ki bane là fine faire avec li. Et récemment, le 29 Juillet 2020 (sa semaine là), Tahir Ahmad

Naseem ki li aussi ti proclame moi menteur lors so website et dans so bane correspondances, surtout celui du 10 Juin 2014, voilà ki li aussi li être assassiné en plein dans la Cour de Pakistan à Peshawar par ene dénommé Khalid.

Couma mo dire zot, nous, nous pas souhaite malheur de personne. Zamais moi personnellement mo fine vine de l'avant et déclarer ki intél et intél fausse et ki moi mo vrai. Tanque ki Allah pas donne moi sa l'ordre là, zamais mo capave faire sa. Et parski aussi, Allah ena la capacité pou élève plisse ki ene Mujaddid. Alors, mo pas gagne droit faire commentaire lors quique ce soit à moins Allah dire moi faire li. Faudré ki bane là en premier fine piétine mo l'honneur et mo véracité kot zot réhausse zot proclamation par déclare moi menteur ki à ce moment là Allah fine donne moi permission pou deboute et challenge sa bane là [d'ailleurs Mubahila ki mo ti fer avec Abdul Ghaffar Janbah pas ti à cause li fine dire moi mo ene menteur, mais parski li fine dire ki Hazrat Mirza Bashiruddin Mahmud Ahmad (ra), le Musleh Ma'ud ene menteur]. Et kan mo fine obéir Allah et reste dans limite ki Li fine prescrire pou moi, Allah fine continuer soutenir moi et renforci So promesse lors moi et So Jamaat ki Li fine accorde moi pou amène l'unité de bane musulmans et de l'humanité lors le *Tawheed*.

Donc, li bien triste, ki bane dimounes vine de l'avant et faire bane tels déclarations ki pas basé lors le *Taqwa*, et alors plus devant zot alle gagne cogner. Ki Allah continuer protège l'identité de mo véracité et inspire bane lécoeurs vers So véracité. *Insha-Allah, Ameen*.

Donc, mo ena sa l'espoir là lors Allah (swt) ki Li pour donne nous sa *Tawfiq* là ki pratiquement à travers nous bane sacrifices, nous pour apporte ene révolution spirituelle à travers le monde entier dans sa siècle là, pas avec l'épée, ni verse du sang, mais avec arguments et raisonnements et *duahs*. Sans *duahs* et l'aide Allah, nous pas pou capave amène sa révolution spirituelle là, kot bizin détache zot avec zot bane idoles et attraction de Shaytan dans sa le monde ici-bas là. *Insha-Allah*.

Pas guette visage de sa bane Mullahs fanatiques là, ki pé sacrifier zot zis pour idole/s ; zot péna ditout disang spiritualité. Donc, li pas possible ki sa grand révolution là arriver juste avec bane mots. Bizin souffler sa l'esprit de sacrifice là dans ou, kot sak papa bizin vine couma ene Ibrahim (as), kot chaque madame bizin vine couma Hazrat Hajra (ra) et sak zenfant bizin courber et obéir, ene l'obéissant totale [complète] envers zot papa et maman couma Hazrat Ismaël (as)

et c'est à travers zot bane sacrifices ki zot tous pour faire dans Jamaat Ul Sahih Al Islam Internationale ki pour capave : **ARISE AND CREATE A NEW WORLD**, ki pour donne la vie à travers le monde entier, *Insha-Allah*. De partout ene seul la voix ki bizin lever et nous dire, tous ensemble : **LABBAIK, ALLAHUMMA LABBAIK**.

Ki Allah (swt) aide sakaine parmi nous, protège nous contre l'effet de Shaytan et contre complots de bane *Zaalims* et faire nous reste bien ferme lors nous croyance dans la Manifestation Divine. *Ameen, Summa Ameen, Ya Rabbul Aalameen*.